

Poeniteat generis tamen & se Cenea malint,
Aut in fœmineam penitus transire figuram: Et Ausonius:
Mœret in antiquam Ceneus revocata figuram.

Ita *Licinio Crasso & C. Cassio Longino* Coss. *Cassini* puer factus est ex virgine: Et *Licinius Mutianus* apud *Plinium* prodit, visum à se Argis Aristontem, cui nomen Aristusæ fuisset; nupsisse etiam, mox barbā & virilitatem provenisse, uxorémque duxisse: *Plinius* ipse ait se vidisse in Africa mutatum in mare die nuptiarum *L. Cossicium* civem *Tisdritanum*: Hæc vera esse & multis aliis comprobari posset, si opus foret: Ex calore verò auctiore redditio genitalia membra seu virilia ex corpore protrusa certum est. Cùm enim fœmina sit longè mare frigidior, interiusque abscondita habeat, quæ mas foris, ut medici dicunt, hinc natura dubia, num mare an fœminam generaret, fœminam expressit exterius, licet mare interius meditata sit. Hinc calore per ætatem crescente & motu accidente recondita membra eruperunt seque omnibus visenda monstrârunt: Eodem modo apud Philosophos fœmina calore aucto sit masculus, hoc est, Hermaphroditus fœmineum sexum amittit, & fit mas fortis & severus, qui nihil muliebris in se habeat mollitiei aut levitatis. Ita à celeberrimo illo *Cap. Tagliacotio Bononiensi* medico vidimus aliquando artis chirurgicæ industriâ nobilem puerum *Hermaphroditum* in perfectum mare, generandæ soboli (ut spes erat) aptum, mutatum vel potius promotum esse, facto per mentulam (quod deerat ibi) foraminen novo & occluso inferiori quasi muliebri. Philosophi hisce omnibus manuariis operationibus non egent. Cùm enim frigiditas & humiditas lunæ adfuerit, fœminam vocant, cùm caliditas & siccitas Solis, masculum; Cùm omnes illæ quatuor qualitates simul, Rebis vel *Hermaphroditum*; Et sic facile conversio fieri poserit fœminæ, hoc est, frigiditatis & humiditatis, in mare mutatio, quæ sit solo ignis calore, ut dictum; Calor enim sequestrat & separat superfluitates humiditatum & sui ideam in subjecto Philosophico statuet, quæ est tinctura.

Im